

Զ .

Մանկան հոգին դո՛ւ կ'աննես, լուք Գըրոն եղեր մահանայ.  
 Չալում ես քեզի՛ կ'ասես, քո հորըն տընակն երերայ.  
 Խա՛ժ աչք, ես ըզքե՛զ սիրեմ, թող ալամս ամենն իմանայ.  
 Թող զիս ի վըրադ մորթեմ, հենց հաշուեմ թե օր մի չեղայ:

Է .

Գիշերս ես ի դուրս ելայ, դարայկօզ ու բարակ լուսունկայ.  
 Կօզալ մ'այլ ի դենս ելաւ, քըրտընած ու բաղնելըլայ.  
 Երի թե աննեմ պագնեմ, նա բոլորն երթար դալապայ.  
 Պէջան այլ ի վեր իկալ, թուփ ունօքն արաւ թե՛ Գընա՛,  
 Գընա՛ 'ւ իրիկունն եկո՛, հաւն ի քուն, որ մարդ չիմանայ:

Ը .

Գիշերս ես ի դուրս ելայ. մութ գիշեր, չիկայ լուսունկայ.  
 Բըռնամ այս բարակ ճամբեկս ու երթամ մինչ որ լուսանայ,  
 Շատ գեղ շատ քաղաք անցայ, այս գեղիս դեմըն կապեցայ.  
 Թող շէն ու բոլոր մընայ, թ' ի՛նչ աղէկ կօզալ կու կենայ:

Թ .

Չմարչըն սիրու տեր կ'անեն ու կուտան ճամփան թե՛ Գընա՛,  
 Յաց մի պաշարիկ կուտան, ո՛չ երկու պագիկ նըլաղայ:

Ժ .

Գիշերս ես ի դուրս ելայ, ի վերի թաղըն նայեցայ:  
 Չարտախ մ'ապիկի տեսայ, իմ եարիկն ի հոն կու խաղայ:  
 Չգիտեմ թե սիրե՞մ ըզնա, թե թողում որ այլ մեծանայ:  
 Երթամ ու հեռուկ կանգնիմ ու պահեմ զաչերս ի վերայ:  
 Մէկ մ'այլ գայ թե՛ «Տեր կանգնիմ», նա թափեմ զարիւնս ի վերայ:

ԺԱ .

Գիշերս ես ի դուրս ելայ, թուխ ամպ էր 'ւ անուշ կու ցողայ.  
 Ղարիպ սիրու տեր մանուկս դըռնէ դուռ անկեր կու դողայ.  
 Յարսնուկ մ'Աստուծոյ սիրուն գիր կողպած դուռըն կու բանայ.  
 «Եկո՛ գքեզ ի ծոցս աննում մինչեւ որ ոըրտիկս հովանայ:  
 Արի՛ ու հընցկուն գընա՛ որ ծոցուս տերըն չիմանայ:  
 Մահիկըդ դանկով կ'աննէ, արիւնովդ ըզձեռն լըլանայ»: